



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL**

Komunikadu Imprensa

11 Dezembru 2020

**Informasaun kona-ba violénsia bazeia ba jéneru no asesu ba justisa formal
importante tebes ba comunidade Suku Haupu**

Iha 03 Dezembru 2020, JSMP hala'ó treinamentu kona-ba “Feto no labarik sira ninia asesu ba iha sistema justisa formal” iha Suku Haupu, Posto Administrativu Letefoho, Munisípiu Ermera. Treinamentu ne'e iha âmbito Kampaña loron 16 Ativismu Kontra Violénsia Hasoru Feto no Labarik.

“Feto no labarik nu'udar grupu vulnerável ne'ebé dalabarak hetan violénsia, violasaun seksuál, abuzu seksuál no diskriminasaun oin-oin husi sira ninia família no sociedade. Ho treinamentu ida ne'e bele kontribui hasa'e koñesimentu sociedade kona-ba direitu ema hotu-hotu no dalan atu asesu ba justisa formal,” dehan Diretora Ezekutiva JSMP, Sra. Ana Paula Marçal.

Materia ne'ebé apresenta iha treinamentu ne'e kona-ba feto nia direitu, saida mak violénsia doméstika, Lei Kontra Violénsia Doméstika, prosesu legál no protesauun legál no oinsa atu refere kazu violénsia bazeia ba jéneru.

Durante treinamentu, partisipante sira foti kestaun balun relasiona ho prosesu kazu infantísidiu ne'ebé akontese barak iha Dili. Aleinde ne'e, partisipante sira mós preokupa kona-ba kazu abandona (inan-aman sira la tau matan ba nia oan sira).

Relasiona ho preokupasaun hirak ne'e JSMP esplika katak infantísidiu ne'ebé akontese barak iha kapitál Dili ninia autór (arguidu/a) balun agora dadaun kumpri hela pena prizaun no balun ninia prosesu iha faze akuzasaun ona hein ba julgamentu no balun iha faze investigasaun (polísia no prokuradór sira sei halibur prova).

JSMP mós esplika katak iha kazu infantísidiu sira ne'e akontese tanba feto hetan presauun husi mane ne'ebé fó isin rua lakohi responsabiliza no kazu balun akontese tanba inan-aman ka família fó sala ba nia oan feto no la fó korajen ka protesauun ba nia oan feto sira.

Entretantu ba kazu inan-aman abandona sira nia oan sira, JSMP esplika katak Lei Sivíl asegura labarik sira nia direitu ba alimentasaun (han-hemu, hatais no kuidadu husi inan-aman) tanba ne'e bainhira aman ka inan ida abandona nia oan sira. Parte sira ne'e ka família bele representa menór sira ba iha Defensoria Públiku hodi halo mediasauun no hamosu akordu ida ba inan ka aman atu kumpri sira nia obrigasaun fó alimentasaun ba sira nia oan. Maibé se karik la konsege rezolve ka hetan solusaun, menór nia representante ne'e bele lori kazu ne'e ba iha prokuradór atu husu asaun sivíl hasoru inan ka aman ne'ebé la kumpri nia obrigasaun alimentár ne'e.

JSMP observa katak partisipante sira iha treinamentu ne'e, hotu-hotu iha interese hodi rona no diskute bainhira fasilitadór apresenta materia.

Treinamentu ne'e loke direita husi eis Administradór Postu Administrativu Letefoho, Sr. Adolfo Soares, ne'ebé representa Administradór no partisipa mós husi Xefe Programa Governasaun UNDP, Sr. Yougchan Kim, Komandante Polísia Eskuadra Letefoho, Sra. Olinda Amaral, Diretór ALFeLa, Sr. Antoninho Marques no Diretora JSMP, Sra. Ana Paula Marçal.

Iha abertura ba treinamentu ne'e, representante Administradór Postu Letefoho, Sr. Adolfo Soares hato'o nia agradesimentu ba ekipa tanba bele hala'o atividade treinamentu iha postu Letefoho liu-liu iha Suku Haupu. Eis Asministradór ne'e husu atu treinamentu hanesan ne'e halo mós iha suku ualu (8) seluk ne'ebé partensia ba iha Postu Letefoho nune'e komunidadade sira bele kompriende oinsa asesu ba justisa formal no kontribui hamenus violénsia hasoru fetu no labarik.

Liafuan badak husi Xefe Programa Governasaun UNDP Sr. Yougchan Kim, haktuir katak fetu no labarik sira tenke haksolok no sente seguru iha ne'ebé deit no iha kualkér fatin, iha uma, eskola no iha fatin públiku sira iha teritoriu Timor-Laran tomak. Nia salienta liutan katak iha mundu modernu inklui Timor-Leste, fetu no labarik fetu barak mak continua ema la respeita no la seguru, tanba ne'e iha nasaun sira iha mundu komemora lora 16 ativismu hahú husi lora 25 Novembru to'o 10 Dezembru hanesan lora eliminasaun ba violénsia kontra fetu no labarik. Nia hatutan katak UNDP iha komitmentu atu hapara violénsia kontra fetu no labarik liuhusi ninia programa sira.

Komandante Eskuadra Postu Letefoho Sra. Olinda Amaral iha nia liafuan badak hato'o katak nia parte orgullu tebes ho programa ne'ebé JSMP no ALFeLa realiza hodi fahe informasaun ba komunidadade sira. Nia fiar katak ho treinamentu husi JSMP ne'e, komunidadade sira bele kompriende prosedimentu sira oinsa atu lori sira nia kazu ba sistema justisa formal, tanba iha realidade kazu barak mak akontese hanesan kazu violénsia doméstika, abuzu seksuál no abandona labarik maibé komunidadade barak mak la hatene oinsa atu prosesu.

Aleinde ne'e komandante ne'e hato'o mós sira ninia preokupasaun balu liga ho sira ninia atendentu ba vítima sira mak hanesan menus transporte no mós facilidade hanesan komputadór no seluk tan, nune'e nia husu atu parte relevante sira bele tau atensaun ba preokupasaun hirak ne'e.

Entretantu, Diretór ALFeLa, Dr. Antoninho Marques iha nia intervensaun haktuir katak atu hapara violénsia kontra fetu no labarik fetu presiza koperasaun serbisu tanba dalabarak komunidadade sira ne'ebé infrenta violénsia bazeia ba jeneru hetan difikuldade atu asesu

Rua Beco Lakateu, Aldeia Manu fuik, Suku Kolmera, Administrativu Vera Cruz

Munisípiu Dili, Timor-Leste
P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste

ba iha sistema justisa formal. Nia hatutan ho ida ne'e mak programa ne'e esensial tebes atu ajuda maluk sira ne'ebé mak seidak komprende no intende didi'ak kona-ba prosesu sira tuir sistema justisa formal.

Iha sesaun enseramentu ba treinamentu ne'e Xefe Suku Haupu, Sr. Eusebio Alcino Maia iha nia intervensaun agradese tebes ba JSMP tanba fahe ona informasaun importante ba komunidadada sira. Xefe suku ne'e rekomenda atu kontinua halo treinamentu hanesan iha futuru ba komunidadade Suku Haupu.

Partisipantes sira iha treinamentu ne'e mai hosi membru konsellu suku hanesan xefe aldeia sira, xefe joventude no komunidadade Suku Haupu rasik no total partisipantes hamutuk nain 23 ne'ebé kompostu hosi feto nain 9 no mane nain 11.

Treinamentu ne'e realiza ho apoiu orsamentu husi UNDP liuhusi projetu Spotlight.

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>

Rua Beco Lakateu, Aldeia Manu fuik, Suku Kolmera, Administrativu Vera Cruz
Munisípiu Dili, Timor-Leste
P.O Box ; 275 . Tlp 3323883

Website: www.jsmp.tl no facebook: www.facebook.com/jsmp.timorleste